



As n boer n kaalf 'vongen' het, is din joen eerste vraag: Oh, en wat was t, n bol of n veerskaalf? As dat joen eerste reactie is, din duur ik ter wat onder verwedden dat ie ien t aigenste affeer touholden: ook agrarische sector. Veur aander lu is n kaalf gewoon n kaalf en doar mit oet. n Kaalf wordt op n gegeven ogenblik n bol of n kou. Dat zukse baisten onderwegens van kaalf noar kou ook nog n zetje heukel binnen, veur wel het dij waitenschop aans zin as veur ain dij der belang bie het of ervoaren mit?

t Is t zulfde as dat verhoal van dij Eskimo, dij nait wait wat 'snij' is. Mor veur dat aigenste widde spul het e áál verschaaiden woorden, aal noar grootte van vlokken en zukswathin. Of dij Indioan dij nait gewoon zeggen kin 'boer het n lutje eend dood moakt': hai mout eerst waiten wat soort eend of t west het, hou of boer te waark goan is (het e t met n mès doan?) en of t zien aigen eend was of van n aander...

Wat veur joe van belang is, dat komt ien joen woordenboek veur. Wieder meschain nog n luk beetje der omtou, mor din is t gebeurd. Wat belang zol je der ook bie hemmen om n bult méer waiten te willen as dat neudeg is? n Slichte regen, n kort buike, n 'gobbe', n 'spidder', n 'swaalke' of n 'strieker', wat moakt dat oet veur ain dij veur zien eterij nait òfhankelk is van hou t steld is mit t weer? Boeren kieken noar lucht, en ien zukse zummers as aan nou tou ook lu oet wereld van horeca. Nog ais: ien joen aigen woordenboek kommen dij woorden veur doar je wil van hemmen.

Háár Ter Loan wat mit lu dij wat heur liggoamslengte aangait abnormal wazzen? Lutje lu, dij je ien t Hollands aanduden kinnen met 'dreumes' stoenen mit grode regelmoat ien dat mooiste Grun-

neger taalboek dat ter is. n Deup of deupke, n doem-oet-haanske, n grompie, n keudel, n keudel-doemke, n prengel, n preuksel, n prewwel, n prugel, n spork, n tjoop, n stop-in-heeg, n korrel, n prop, der binnen nogal wat woorden veur. Kroep-ien-buus, kroep-ien-dòb-, kroep-ien-heeg, kroep-in-de-kroane, kroep-oetje, kroep-oet-dop heb k ook nog op mien liestje. t Kin wezen dat dij nait apmoal ien Ter Loan te vienden binnen, mor da'k heur gewoon verzoemeld heb omdat ik dat zukse schiere woorden von. n Aander spoart postzegels dij PTT oet 'geft' - tegen betoalen - as ze t doar aan tou hemmen, ik spoar laiver wat dat je zomor van joen noabers kriegen kinnen - vergees - as je der oor veur hemmen: mooie woorden. Ik heb niks met laange mensen, ook nait mit laange mensen dij moager binnen tougelieks. Toch heb ik onderhand n nuver nustje woorden bie nkander veur dat soort 'raaigers', zeg mor 'lang en dun persoon'. En om joe te bewiezen dat ik niks mit dat soort lu heb: aal dij woorden heb ik zowat ien Ter Loan vonden, weer op n poar regenachtege oavends. n Laank persoon huift nait dik wezen, mor mainstied gaat dat soamen: wat ien lengte zit, kin nait meer veur brede dainen ze'k mor zeggen. En doarom zel n laankhaals noast zien lengte ook moagerte hemmen, net as zien bruier dij laankwams hait. n Lemperd, ook wel lange lemperd, het laange onderdoanen en heurt dus ook bie onze collectie. n Schietspoide ook, mor dat is ook wat minder positief bedould, liekt mie zo. Mor nait bie ale woorden veur laange, moagere lu is dat neudeg, dat bewiezen woorden as spilter, ringel, sprik, taaiterlaait, gebe, aaiber of aaiberd, bainderd en laaiter.

En gain commentaar laifst, dat ik dij mensen discrimineer. Ze hemmen der ja allinneg mor veurdail van. Ze basketballen beder en kinnen gauwer appels plukken ook, want ze kinnen overaal beder bie kommen. Ze hemmen wil van heur lengte. Doarom haiten ze ook wel linnenrik en kapstok. Mor dat mouten hoast wel woorden wezen van hoesevrauwlu: elk het ja dij woorden ien zien woordenboek stoen dij e neudeg het.

Siemon Reker